

25 December. 2025

समे .18:15 Hrs

<><><><><><>

Headlines

- प्रधानमंत्री नरेंद्र मोदी होरें लखनऊ च राष्ट्र प्रेरणा स्थल दा कीता उद्घाटन। 11एं ब'रें दे समावेशी सुशासन गी सच्ची धर्म निरपक्खता दस्सेआ।
- लेफ्टिनेंट गवर्नर मनोज सिन्हा होरें आखेआ जे महामना ते अटल जी हुं'दे विकसित भारत दे आदर्श म्हेशां लोके गी प्रेरित करदे रौहडन।
- जम्मू-कश्मीर च क्रिसमस दा त्यौहार पूरे जोश ते जज्वे कन्नै मनाया गेआ।
- आर.टी.ओ जम्मू नै जम्मू च मौजूद बाहरा थमां आई दिएं गड्डिएं दे परतिएं पंजीकरण लेई 15 दिन होर दित्ते न।

<><><><><><>

PM Lucknow

प्रधानमंत्री नरेंद्र मोदी होरें अज्ज आखेआ जे पिछले 11एं ब'रें थमां उंदी सरकार समाज दे हर इक नागरिक दी बेहतरी लेई सख्त मेहनत करा'रदी ऐ ते स्कीमें राहें उ'नेंगी विजन कुसै फर्कोफर्की दे सब चाल्ली दे लाहू हासल करोआ'रदी ऐ जेड़ा इक सच्चा-सुच्चा सुशासन ऐ ते सच्ची धर्म निरपक्खता ऐ। प्रधानमंत्री मोदी, साबका प्रधानमंत्री अटल बिहारी बाजपेयी हुं'दी 101मीं जयंती दे मौके पर लखनऊ च इक सार्वजनिक रैली गी संबोधित करा'रदे हे। उ'नें लखनऊ राष्ट्र प्रेरणास्थल दा उद्घाटन कीता जेदा निर्माण स्वतंत्र भारत दिएं महान विभूतिएं दे गौरवशाली विरसे दे प्रति सम्मान प्रगट करने दे श्री मोदी हुं'दे संकल्प मताबक कीता गेआ ऐ। राष्ट्र प्रेरणा स्थल श्री बाजपेई हुं'दी जीवन ते आदर्श गी श्रद्धांजलि होग। अपने संबोधन च प्रधानमंत्री होरें आखेआ जे सरकारी स्कीमें दी परिपूर्णता उंदी सरकार दा लक्ष्य ऐ ते हुन करोड़ा बदे गरीब नागरिक इन्दे थमां लाहू ठोआ'रदे न। इस मौके पर भारत रत्न अटल बिहारी बाजपेयी होरें गी चेत्ता करदे होई प्रधानमंत्री होरें आखेआ जे उनें नेहियां केई पहलकदमियां चलाइयां न जेदे नै मुलखे दी तरक्की आह्ला मंजर बदली गेआ ऐ। उनें बशेश करी प्रधानमंत्री ग्राम सड़क योजना जनेहूी पैहलकदमी दा जिक्र कीता ते आखेआ जे 2000 ब'रे मगरा इस स्कीम तैहत 8 लक्ख किलोमीटर सड़कें दा निर्माण कीता गेआ जिंदे चा 4 लक्ख किलोमीटर सड़क पिछले 11एं ब'रें च बनाई गेयी। रक्षा मंत्री राजनाथ सिंह ते मुख्मन्त्री योगी आदित्यनाथ ते राज्य मंत्रिमंडल दे दुए सीनियर मंत्री बी इस मौके उत्थें मौजूद हे।

<><><><><><>

LG-Tributes

उपराज्यपाल मनोज सिन्हा होरें अज्ज महामना पंडित मदन मोहन मालविया ते साबका प्रधानमंत्री अटल बिहारी बाजपेयी हुं'दी जयंती उप्पर श्रद्धांजलि अर्पित कीती। उपराज्यपाल होरें आखेआ जे महामना ते अटल जी हुं'दे विकसित भारत दे नजरिये ते समाजी एकता, एक समानता ते न्याय दिएं शिक्षाएं म्हेशां थमां गै सभनें लोकें गी प्रेरित कीता ऐ। एल.जी होरें आखेआ जे इंदी दूरदृष्टि करी गै नमें भारत दा निर्माण मुमकन होआ। उपराज्यपाल होरें एहू गल्ल उत्तर प्रदेश दे गाजीपुर च पंडित मदन मोहन मालविया इंटर कालेज दे इक कार्यक्रम दरान आखी।

<><><><><><>

Jitendra-Good Gov.

कार्मिक ते पेंशन विभाग दे राज्यमंत्री डॉ. जितेंद्र सिंह होरें आखेआ जे सुशासन कोई अमूर्त आदर्श नेई ऐ। एहू रोजो-रोज नभाने आहली प्रशासनिक जिम्मेवारी ऐ जेहदी जड़ मूल च पारदर्शिता, जवाबदेही ते नागरिकें पर केंद्रित सेवाएं दस्तेयाबी यकीनी करना शामिल ऐ। दिल्ली च सुशासन दिवस दे मौके पर राश्ट्री कार्यशाला गी संबोधित करदे होई मंत्री होरें जोर पाइयै आखेआ जे बक्ख-बक्ख मंत्रालयें ते विभागें दे आपसी तालमेल नै प्रशासनिक समर्थ बधाई ऐ ते समाज कल्याण दे बेहतर नतीजे सामने आए न। उनें आखेआ जे सुशासन दिवस दी इक बशेष महत्ता ऐ कीजे राश्ट्र साबका प्रधानमंत्री अटल बिहारी बाजपेयी हुं'दी जयंति मना'रदा ऐ जिनें सार्वजनिक जीवन च ईमानदारी आहली सोच गी संस्थागत कीता ते अस सुशासन दी नीहू रक्खी जित्थे लोकें गी तरजीह दिती जंदी ऐ।

<><><><><><>

PM-Modi Khel

प्रधानमंत्री नरेंद्र मोदी होरें आखेआ ऐ जे संसद खेल महोत्सव मुल्ये गी ज्हारां बदे योग्य ते प्रतिभाशाली एथलीट देआ'रदा ऐ। अज्ज वीडियो कांफ्रेंसिंग राहें संसद खेल महोत्सव गी संबोधित करदे होई मोदी होरें आखेआ जे संसद खेल महोत्सव दा स्तर ते असर बड़ा मता बधेया ऐ। उनें आखेआ जे खेड उत्सव नौजवानें दे विकास राहें राश्ट्र निर्माण दे मंत्र कन्नै इक सशक्त थम्म दे रूपै च उभरा करदा ऐ। प्रधानमंत्री होरें आखेआ जे हा जित शा परे एहू खेड्डां एथलीटें च खेड्डा भावना ते सच्चे सुच्चे तरीके नै खेड्डने आहले मुल्ये गी बधां दियां न ते समर्थवान ते अनुशासित नौजवानें दा विकास करदियां न। तोआई, उधमपुर च जिला प्रशासन नै संसद खेल महोत्सव पर जीवंत वर्चुअल प्रोग्राम लेई बशेष इंतजाम कीते दे न। जिले दे बक्ख-बक्ख शिक्षा इदारे दे स्पोर्ट्स टीचर ते अधिकारी निर्धारित थाह किट्टे होए ते प्रधानमंत्री हुं'दे आसेआ विद्यार्थिएं ते खड्डारिएं कन्नै कीती गेदी गल्लबात गी लाइव दिक्खेआ।

<><><><><><>

Martyrs

भारती सेना दे जे.सी.ओ शहीद सूबेदार सुरजीत सिंह हुं'दा कल वीरवारें रियासी जिले च उन्दे जद्दी ग्रांऽ सिरला कटडा च पूरे सैनिक सम्मान कन्नै अखीरी संस्कार कीता गेआ। सूबेदार सुरजीत सिंह होरें'गी 24 दिसंबर मंगलवारें चिरें जिला साम्बा च ज्यूटी दरान गोली लग्गी ही ते ओहू जख्मी होई गे हे, मगरा उनें शहादत पाई। उन्दे पार्थिव शरीर गी अज्ज दपैहरी मगरा जद्दी ग्रांऽ लेता गेआ जित्थे मती गिनतरी च सेना दे कर्मी, सिविल प्रशासन दे अधिकारी, स्थानीय बसनीक ते परिवार आहले मौजूद हे जिनें शहीद सूबेदार सुरजीत सिंह होरें गी अखीरी श्रद्धांजलि दिती। राइजिंग स्टार कोर नै दलेर सूबेदार सुरजीत सिंह होरें'गी श्रद्धांजलि अर्पित कीती जिनें ज्यूटी दरान अपनी जिंदू दा महान बलिदान दित्ता। भारती सेना मुश्कल दी इस घड़ी च प्रभावित परोआर कन्नै मजबूती कन्नै खडोती दी ऐ।

<><><><><><>

Christmas

अज्ज समूलची दुनिया च “क्रिसमिस” दा त्योहार मनाया जा'रदा ऐ। दुनिया भर च ईसाई समुदाय दे लोक यीशु-मसीह हुं'दे जन्म दे चेतें च क्रिसमिस मनांदे ना। इस मौके पर लोक “क्रिसमिस” गी रंग-बिरंगियां लडियां- तारें ते बक्ख-बक्ख किस्मां दे फुल्ल लाइयै अपने घर सजांदे न ते इक्क-दुए गी तोहफे दिंदे ना। सब्बनें गिरजाघरें गी शैल सनाहकडे ढंगे कन्नै सजाया गेदा ऐ ते Mass Prayers सनें टकोहदे कार्यक्रमें दा बी सरिस्ता कीता गेआ। दुनिया दे बक्ख-बक्ख हिस्सें आहला लेखा जम्मू-कश्मीर च बी क्रिस्मस दा त्यौहार धार्मिक श्रद्धता ते उत्साह कन्नै मनाया गेआ। उपराज्यपाल मनोज सिन्हा, मुख्मन्त्री उमर अब्दुल्ला ते होर दुए मंत्रिणें लोकें गी क्रिसमस दी मुबारकबाद दिती।

<><><><><><>

Poonch

बर्फु कन्नै ढकोए दे पहाड़ें आहले पुंछ जिले च बी क्रिश्चन समुदाए दे लोकें अज्ज क्रिसमस दा त्यौहार धार्मिक श्रद्धा ते हर्षोल्लास कन्नै मनाया। इस मौके पर बक्ख-बक्ख चर्चें च विशेष प्रार्थनाएं दे कन्नोकन्नी घरें ते गिरजाघरें गी शैल सनाहकडे ढंगै कन्नै सजाया गेदा ऐ। जिले दी बक्ख-बक्ख गिरजाघरें च अद्दी रातीं दी प्रार्थनाएं दा आयोजन कीता गेआ जित्थे श्रद्धालुएं बधी चढियै हिस्सा लैता। स्हाड़े संवाददाता कन्नै गल्ल करदे होई पुंछ दे क्रिश्चन समुदाय दे प्रधान नाना गिल होरें आखेआ

<><><><><><>

उधमपुर जिले च बी भगवान जीशू हुं'दे जन्मदिन दा त्यौहार क्रिसमस धार्मिक श्रद्धा ते उत्साह कन्नै मनाया गेआ। कड़ाके दी ठंडू दे बावजूद बी ज्हारें दी गिनतरी च क्रिश्चिनें बक्ख-बक्ख गिरजाघरें च विशेष प्रार्थनाएं च हिस्सा लैता। मुख समारोह कस्बे दी यूनियन चर्च च आयोजित होआ, जित्थे विशप डॉ. संतोश थॉमस होरें भगवान जीशू हुं'दी शिक्षाएं उप्पर लोऽ पाई। उनें आखेआ

<><><><><><>

RTO Registration

जम्मू दे आर.टी.ओ होरें इक्क पब्लिक नोटिस जारी करदे होई आखेया ऐ जे जम्मू संभाग च दुए राज्यें चा केन्द्र शासित प्रदेश च रजिस्टर्ड तय समें शा बद्द चला'रदियें मोटर गड्डियें दे मालकें गी बिजन देरी दे नमें सिरिया पंजीकरण लेई आवेदन करने दे निर्देश जारी कीते न। आकाशवाणी दे जम्मू संवाददाता नै दस्सेया जे नोटिस मताबक तय समें कोला बद्द चला'रदियें मोटर-गड्डियें गी बिजन परतियै रजिस्ट्रेशन दे 12 महीने शा बद्द समें तगगर जम्मू रखना कानून अपराध ऐ। इस्स चाली दियें गड्डियें दे मालकें गी नोटिस जारी होने दी तारीख थमां 15 दिने दा समां दिता गेया ऐ जे ओ नमां रजिस्ट्रेशन करोआई लैन। कसूरवारें खलाफ सख्त कारवाई करदे होई उं'दी गड्डी जब्त करना- हिरासतै च लैना- जुर्माना लाना ते होर दुई कानूनी कारवाई कीती जाग।

<><><><><><>

Land-Doners

सिंचाई ते हाड नियंत्रण मैहकमे गी अपनियां जमीनां दान करने आहले लोकें दे इक डेलीगेशन नै अज्ज जम्मू च जलशक्ति मंत्री जावेद अहमद राणा हुं'दे कन्नै मलाटी कीती ते अपनी मंगें दे हल सरबंधी इक चेता पत्र सौंपेआ। उ'नें मंत्री होरें'गी दस्सेआ जे उ'नें सिंचाई ते हाडें दी रोकथाम सरबंधी ढांचा विकसित करने लेई मुतल्लका विभाग गी अपनियां जमीनां दान कीतियां न। उ'नें अपनी जायज मंगें दे हल दी गुजारिश कीती। मंत्री होरें उ'नेंगी यकीन दोआया जे उं'दी समस्याएं दा हल फौरी तौरा पर कड्डेआ जाहग।

<><><><><><>